



Selasa, 17 September 2024

Ogen: Sakaria 8:1-23



Kuta Si Badia



Kekelengen e me palas si erbahanca megegeh. Kekelengen si la ersibar e njemba Dibata guna tetap ngaloken Jerusalem i bas kerina kecibalna. Seh belinna kekelengenNa e, labo terjeng i bas cakap sini belasken saja tapi icidahken pe arah perbahanen-perbahanen Dibata nandangi Jerusalem. Nembeh atena musuh-musuh Jerusalem, janah ibahanna me geluh dame kerina kalak si ringan i Jerusalem, subuk orangtua si kundul-kundul alu teneng i pasar-pasar kuta, bage pe anak-anak guro-guro i bassa. Melala kalak erpengakap si enda labo banci jadi, erkiteken situasi si genduari kecibal Jerusalem seh runtuhna. Tapi kai si la banci ilakoken Dibata? Kai pe banci ilakokenNa. Alu lanai nginget-ninget perbahanen nini si ndube (si melala ngelakoken salah entah nilah i bas Dibata nari), Dibata ncidahken kekelengenNa mpekena-kena mulihi Jerusalem. Jerusalem iulihken jadi Kuta Si Badia. Biasana pe nandangi si keleng ateta silakoken nge perbahanen si maba kiniulin, kemalemen ate man bana. I tengah-tengah kegeluhenta, kekelengen e tetap min belinen bas geluhta. Erlajar arah perbahanen Dibata, nandangi si keleng kal ateNa, ipekena-kena, ipebadiakenNa mulihi dingin ibahan kedamen e jadi man bana. Jadi me kuta si Badia. Jabuta, gerejanta ras kutata e me kuta si badia. Melala nge si la payo si idah i bassa, tapi tanda keleng ateta kempaksa, rehlah min inisiatif entah ukur ersuruh guna mpekena-kenasa. Njadiken ingan e ingan erguro-guro, si tuhu-tuhu meriah akap kalak si ringan i je. Kerina enda banci jadi adi kita ncidahken ateta keleng si mbagesna kempaksa, labo ipebelin sikap apatis entah tidak mau tahu (la urusenku). Cidahkelah kekelengen si mbagesna e.